

二酉尺牘十五



五嶽山人尺牘卷之十四

沔陽陳文燭玉叔著

報蔣魯山少叅書

門下抱李令伯之陳情而懷王陽之畏道可謂
孝矣古之求忠臣今之濟時艱者必及焉求羊
三徑向禽五宗恐未可耽也時向陸生詢起居
佳勝方寓書勸駕而門下手書遠及所惠東壁
遺草知家學淵源乃長公又起而紹之真為同
袍一快大作翩翩柰何不見示而以俗吏槩我



耶陸生之官郢上草草裁復佇聽馬首燕路勿
厭承明之廬可也

報彭光祿書

尊公與白不佞雅在交游淮海音書曾及于萬
里橋頭往年會史叅伯寓書尊公及馬仰湖乃
兩公俱修文地下矣客有談兩家亭園俱盛者
宿柯擬于中郎草玄等于楊子異時謁茅山訪
石屋倘一過之當重山陽之感耳執事才美益
光世業尚有良晤在長安市中尊酒放歌如對

尊公耶孟河司業草書真蹟便中幸惠一二

報秦太始秀才書

商彝周鼎持而過三家之市則不售及歷名都
人爭寶之遇合有時也足下好古攻文即所遇
豈常在三家耶努力俟時以慰區區餘情家鴻
臚弟亦能口之

報王南垣大尹書

鳴琴而京源治江漢風流翩翩可想况雙鳥十
竒又公家故事門下起而紹之乎荆楚循良表

厥宅里聊見欽慕之私耳令婿程子秀而文真
玉潤也殊爲門下慶之

報許西峪太守書

往先大夫在職方與尊公大司馬結堂屬魚水
之驩而不佞與令弟後崖在同榜中莫逆雖于
足下未獲接殷勤之雅而奕世通好神交素矣
往年有以尊稿一帙見教者乃惟敬禎伯所序
不佞手之不釋如香山碧雲望湖亭諸作王右
丞孟襄陽語也時時誦服不休頃者借重衡陽

衡山爲朱陵洞天本宇內之奇而足下以風流
儒雅臨之卽靈運之在永嘉玄暉之在宣城沈
約之在東陽李邕之在北海也山川賢哲有待
而成每怪蔡子木近代文人往守衡時厯刻唐
人南嶽小錄而于志事未遑嗣脩者不足爲山
靈重足下事柄正入其手幸一洗而新之俾芙
蓉紫蓋岫嶠祝融益增而高亦千載之大快也
不佞少有名山之癖東岱中嵩稍稍登之而南
嶽去郢中在千里外近日友人爲不佞邁一山

房頗在名勝之處乞足下書一扁異時向長之
願甫畢盧敖之杖必周而足下功德遠矣恃以
世誼乃敢瑣瑣惟高明亮之

報金省吾憲使書

使者授書既而程生文傑適至出足下西湖詩
讀之思我美人在閩之南不啻楓亭荔子也兒
婿辱足下垂愛師生之恩同于父子乃君善尚
在桃花溪上感高誼淪于骨矣滕王閣風景甚
好掃南浦之雲而候使旌足下無意乎連巡公
不甚作御史孔面而其人正直忠厚今有請告
之舉豈八閩無緣耶

又

同心再聚若鳥比翼而魚比目愉快極矣弟近
與桐岡丈修夕佳紫薇二樓持一觴以酌江月
尚有待于高軒耳

報溫一齋中丞書

武林佳翰遠及章江之許西山烟樹南浦水雲
依依然若吐華而增榮矣門下曲江之好幾二

十年而履約甚近無緣趨走于高牙大纛之間
然賢達素交情好完密不以風雨輟其音不以
霜雪渝其色者也不佞何幸焉鍾太僕先職方
厚友重於其鄉况爲門下子期耶尊教謹藏之

又

比諗台從還承明之廬矣天下顚顚望其典樞
密持銓衡端毅事柄駸駸在手異時兩公勲業
並峙三秦真昭代之光而同心之快也行矣五
雲加飡白玉

報王直齋大尹書

衡陽在山水間借重高賢河陽之花在七十二
峰之上矣不佞往年秉鐸西蜀渝州人士曾兩
校之愧無以宣聖化而益名邦至今有悔心耳
乃聞明公倦倦于不佞不知何修而得此也便
中謹此奉候起居惟高明垂照

報胡元瑞文學書

不佞入南浦思閩中荔子爲勞而足下新詩及
之輕紅香肌真不減十八娘也乃蔡伯華誇香

二酉園所藏
卷之四
五
緣顧道行愛香橘而欲班荔子之上乃不佞則
偏于側生耳知味賞音其旨則一博足下一咲

報譚湘臯大尹書

公果與子占建五嶽山房耶聞在壘率菴之前
進使者而談飛泉瀑布為茲山第一聞之冰雪
四座忘暑矣恨不飛渡焉往湛甘泉老而南游
至記懶殘之居則云榛塞無路矣公土人也可
關其路異時以平生著作藏焉得與鄴侯並足
矣

報張載寰祠部書

兒曹與足下同榜而令郎又聘孫女驥尾之附
鳳毛之求蓋兩得焉幸之幸者也比論足下使
旌畫綉于陽春臺畔雙闈遐福其壽無彊况足
下清才雅望出入周衛真天球之列東序明珠
之在昭陽也聞建儲將定出閣有期將選天下
之端士孝弟博聞有道術者以衛翼之而門下
其選也門下豈厭承明之廬者耶幸早命北轅
可也前承門下手書腆貺感高誼無量緣自閩

而江右職事填委久未申謝私心悵結專遣一
力布焉

報孫侯居比部書

往先公在司馬署中與太公交驩莫逆去年讀
明公大疏賈傳之于漢文也而潮陽之行卽長
沙之貶焉異時風猷與昌黎並重海上有不獨
以韓山名者偶得小詩書扇奉上聊見通家之
誼耳忠烈紀遺林石洲文筆與王祭酒並傳矣
謹此謝教

報吳平江太守書

使者授書不佞方退食又兩餘莊誦數過驩次
于面不啻大旱之甘霖也自文章之士有俟于
千百世之後有等于千百世之前者而況生同
其時共事一方如執事之于不佞者乎益知懷
思繾綣蓋由衷真觸也細玩來翰知孝履萬福
良慰鄙懷潯陽宗伯鹿門憲使不佞晚而定交
得執事稱三益矣執事見二先生爲不佞道之
報劉起南大尹書

江都名邑聞天下舊矣而不佞兩渡淮海知之尤詳明公雄才雅度汪洋如江漢不佞傾仰有年而今借重使旌試于百里單父之琴阿陽之花在二十四橋之上矣鄙人欣慰何快如之便中布候蕪城春好惟有神馳

報李泰寰司理書

不佞竊附世好久矣而于淮揚蓋兩渡之頃聞使旌借重司理東海仰淑問之仁肺石彰簡孚之化願益高門以容駟馬明公陰德之報遠矣

不佞承乏江藩幾欲裁候公期鞅掌不遑私布然并州故鄉之念未常不在揚子廣陵間也偶門生徐有年過訪附布區區徐子青年亦可鞭策也

報王襍亭山人書

舍親徐大卿惠我扇頭詩則足下詞翰也輞川詩思蘭亭筆意公家之業千載如新往得陸子無從今見足下甓社湖上兩明珠矣便中附謝報黃對茲給事書

二酉園尺牘 卷之十四
往明公在諫垣大疏侃侃其志直其言危文中
子所稱見忠臣之心者乎直而不迫危而不詆
彰 主上從諫之美焉雖稍稍謫居然佇意明
公者深矣乃召還明公補郎署而直言敢諫曾
不少屈謂苟利社稷生死以之它何計乎海內
士林益壯明公諫書始終不易而

主上又深信之真千載一時矣昔董仲舒賈誼
在漢廷俱以上書貶謫今明公江都有董子之
遺跡非賈生長沙之遠近日南北兩院典御史

臺者如詹如王皆貴鄉直言極諫之士得明公
而三矣

主上終念之賜環有日矣前明公使輶兩渡三
山以接清光為幸恨公期鞅掌不盡請益耳便
中布候餘惟為吾道加愛

報張羽王別駕書

張名川至閩得足下手書及惠來雄篇江漢生
色矣灑山春游比于輞川諸詠管暮雲方伯入
越席上談及足下渠云舊好且令郎孝廉世其

家學往長安市中訪拜而未晤也明卿吳先生
詩老而益工王敬美云吳先生得足下爲畏友
故北園花鳥益深愁耳不知淮海浮蹤何時再
遘之方伯公夜發南浦呼燈草草并以近作請
教栖霞白龍洞不佞濡足尚有日乎臨楮西望
無任神馳

報戴梧臺太守書

漳江柳花片片如雪羅浮山下有美一人便欲
飛去得華翰新詩足快矣賦得焉文榭一章作
它年山陰放舟之券耳幸兄有以教之

報蕭湛泉大尹書

別足下後家居者三年與令弟江池論文又結
好于南紀公子入閩與令兄鷓洲晤及轉豫章
則共事一方矣雖于足下處久未請益而同袍
意氣之厚真完好如金石也近日得邸報知足
下榮轉泗水令矣弟往年登泰山過孔林洙泗
之間尚有絃歌之遺借足下綰綬學道愛人此
爲一驗然昔之任力者戴星出入而不以爲勞

任人者鳴琴在堂而不以為嫌此古人作用之妙今天下多故東土旱甚得一賢令是甘霖也彼虎觀漁奪者無論矣即多事好名者不足以調養元元惟慈母哺子良醫治病乃為可耳足下與弟平日口談卓魯今單父事柄正在其手幸足下樹永世之澤勿負少年所期許可也

報熊成吾太守書

不佞至洪都而同袍兄弟淪落大半即貴府十五人今在仕路者獨兄與春宇燕山耳章江柳

花殊切舊游之感使旌翩翩至任城矣周公之化在齊魯孔子之教在洙泗變而至道千載如新則在良二千石也幸兄勉圖之偶乘泗水令蕭迎之便草草布候蕭子少日與弟同筆硯視一第如芥乃弟南紀遂早發之而此子努力司教得叨今轉兄幸青目之是通家後進所殷望耳

報蔡青門學憲書

足下才氣無雙壓倒太白即黃鶴樓無詩在上

頭崔顥小豎子耳近代若顧華玉有雲荒赤壁
周瑜壘江繞青山夏禹祠之句差爲吐氣足下
留珠玉配之不佞有黃鶴樓二詩俱少年作幸
足下爲我書而勒之石仍跋數語取重異時不
佞鄉人也非借同聲調有氣力者不能爲此舍
足下誰爲不佞子期耶少玄王孫好修而文不
佞神形俱肅者容式問而訪焉

又

前家僮還曾以鶴樓詩寄之明公聊爲引玉計

耳明公功令甫頒荆楚不變倬彼雲漢爲章于
天矣譽髦斯士何幸而被大君子之教也便中
謹此奉候棧樸多勞加飡自玉

報陳紫臺憲副書

三山別後弟遊九鯉湖會公家四樓刺史文酒
極驩望使旌翩翩與西南銅柱遠矣思明費少
府名家子頗能詩畫刺史公雅善幸文垂青目
之

報費民益少府書

讀足下新詩南越山川之助爲多比陸生橐中
裝矣管方伯行曾有書寄張羽王足下見羽王
道之

報吳南洲戶侍書

主上念門下遠在南越功高銅柱留都空司之
轉真暫借耳握樞秉衡又旦夕事不知使旌還
晝綉三山否不佞承乏江藩雖未得侍門下左
右每詢舊吏檢遺牘則門下之弘猷清節屹然
章江之上益知西子毛嬙皎朝日煥浮雲即欲
效贖重增無鹽之愧耳天上故人不遺末照當
有以鞭策之

報羅文洲比部書

淮陰荒祠明公扁而新之異時比鄉社于樂公
等祀典于朱邑非賴明公之重耶東望韓山九
頃以謝

報卓徵父光祿書

閩中兩得報書比至章江時有西湖之夢大空
樓酒尊何日快之所委崧齋石禪庵乞以諸名

作見教便續貂也大宰公詩壯我樓居王雲竹
叅政一頌不佞素愛湯陵初書足下爲我懇書
之百朋之錫也

又

暑中賦得二詩如在崧齋石庵清風習習與足
下悟有禪心矣成梓希惠教數部

報盧龍岩比部書

白雲司稱西翰林舊矣國朝名流比肩而出明
公起而繼之無論改列近幸卽此曹清美矣振

起先輩殷殷于大雅屬之淮海浮蹤武夷浪跡
無禪明公爲愧乃明公尚緩頰無厭耶故人念
何深也咫尺清光無緣一晤迢迢寸心隨使輶
北矣謹此謝翰貺之辱

報趙念我大尹書

孤山水雲西湖烟月欲界之仙都也執事丹心
綠髮雅與湖山稱翩翩乎仙令矣努力加餐以
俟內召故人有欣慰焉

報邵國翹國翰秀才書

二酉園尺牘 卷之十四 古
兩兒少學于京師荷賢橋梓伯仲之愛二十年
如一日也尊公墓表勉爲之不佞文詞遠謝古
人而中郎于林宗昌黎于子厚其情似之耳尊
公遺稿遂一一教之方可爲序昨託縣令于公
家稍加存恤或不相負也

報黃蒼嶽進士書

執事入閩龍君善寓書道高雅也至相與意氣
足消鄙吝又何似吾叔度也公子遠過如對清
光且聞以差入梓里古人勲業文章多進于謫

居幸公加食以膺大用

報王敬美太常書

閩中有尺素謝翰旣足下報書知尚未至豈馮
參伯處少雁魚耶讀近作宛在無諸城中與足
下相倡和也金陵山水佳麗而清卿况甚適故
諸篇益工耳雙龍篇見者比于南北二鳴編附
驥尾而名益彰弟之幸也足下別弟古詩真是
苦心敬附梓呈覽芳潤二陸鼓鑄三謝蘇李河
梁之情異代矣惠來古鼎龍文淑氣在弟得之

三國志卷之十四
便以爲汾陰寶也諸王孫與弟平日神交者六
七人至此俱未面緣自馬中丞事後似有近禁
然音問所惠非足下所序詩文則所刻足下法
書也驪次于面楊懋功時時相晤尊酒有作恨
無畏友如足下可砥礪耳諸山人過訪俱未面
莫公遠亦然且言金陵會王太常太常無書蓋
足下知弟謝容之深不欲弟廣遊道也弟之精
神差強于閩日三分之一可了公事餘尚從事
文翰畢竟是火宅何日到清涼世界耶博足下

一咲

報李見羅中丞書

成周之都武侯之廬叔子之碑皆在明公部內
而明公學術宵次替釜二華吞吐七澤卽所建
樹格于皇天等豐鎬而上之南陽峴首佐下風
矣使旋謝翰教之辱願言加飡以膺大拜

報李瑞塘大尹書

弟自附嘉會于黃鵠磯頭今三十年矣所閱守
令頗多而語古循良指不多屈豈未能操刀而

使割也其傷實多者乎吾兄忠信夙成果敢天
授而歷世已久夫忠于主而信于令果于事而
敢于不善人是子路之治蒲而董安于之晉陽
也又何問西鄉之政耶大都守尊而令親東南
文而西北實也兄親民事柄已入其手而關西
山邑無出入戴星之勞所謂脫之于蒼鷹暴虎
之區而加之以赤子乳哺之賜極之于嚴霜朔
雪之林而沐之以膏澤沾濡之惠惟兄可以語
此耳見羅李中丞有道士也與弟爲通家莫逆

入郎時曾語及于兄而又寓書託之邑有名賢
從政者之快久自魚水矣弟懶殘倦游往年闔
海去家遼遠公子高捷私心沾沾喜矣久不奉
音書無任悵結偶遇劉孝廉附候秦川漢水直
達于沔故人有雙魚乎不勝延佇

報朱可大水部書

承惠佳稿公退讀之如入寶山武庫令人應接
不暇至西曹雜興尤爲感念弟雖未獲侍左右
而情景宛然在目如肺石真無改心田或有收

冷况甘懸磬清光到覆盆天然之語何工而麗也
也因憶廷中若徐昌穀常明卿足下與歐禎伯
皆于雅道有裨焉不知弟能參乎其間否也大
江以西得一良朋矣寧獨通家私快已耶

報李夢池學憲書

不佞聞足下典學之報為閩士欣慰得師曠而
操縵者高山流水矣得歐冶而鍛練者棠谿魚
腸矣第聞中朝士論云足下雄才正氣當為廟
堂重八閩一隅召還有期從者脂轄而北師席

不暇煖矣

報顧道行學憲書

王敬美每言足下可親而無競且謂不佞得一
良友周旋數月肝鬲如一南中銓曹無事柰何
當事者偶及之耶夫沈宋李杜無論矣乃近代
若華玉敬夫子循稚欽子與明卿亦復爾爾果
文之為崇耶然愈貶而愈工卽造化莫得而窮
之足下可自慰矣徘徊名園雖極文酒之驩而
宇內山川待其潤色幸無耽松石軒之勝可也

馬子焮過訪感足下教思無量欲造函丈而叩
馬私心迢迢在太湖館娃之上矣風便努力相
聞

報丁勺源僉憲書

往明公在臺中曾讀其大疏議論侃侃有賈太
傅陸宣公之遺業抱識韓御李之願矣嗣入閩
中明公會爲漳州理官風猷令問與扶桑競爽
及入洪都過通德里門知令先公司馬勲樹明
公起而大之與匡廬爭其雄勝乃鄉人來道明

公休德所至春風秋露入人之深卑衡嶽而淺
洞庭矣是不佞于明公雖未把臂人林而相遇
之跡種種竒矣馬子叔華過訪又言入楚訪明
公與明公有世好談明公詞翰不休而不知不
佞曾見之金三洲比部曾道之欽仰有年矣不
佞近謝客卽平生文字交亦未敢見而馬子與
它游客異幸借此得通于明公也衡雁湘魚咫
尺湓城乎惟明公有以教之

又

三曹國史稿 卷之四
小婿龍君善使來得門下手教驩次于面夫士
之相知有相去千百世相隔千萬里而稱同心
同德者况不佞于門下無論先後閩海聲氣相
聞卽今各分吳楚而治大自臭味者乎門下才
猷揮霍遇事立解此暫借漳州之日凡有才識
者必稱焉頃聞遣使四出迎醫以療病人三楚
以西徼福無量今天下困矣大都遠者紛更而
元氣索近者因循而神氣喪非得兼才如門下
者不能起而振之卽一路而一省可知也卽一

省而天下可知也明公以爲何如君善少年有
雋才不佞甚愛之頃親就門下而辱國士之知
又何患良玉不琢美不言文也敢爲渠代謝之
金邦鼎廢棄可憐往讀其詩無閩人氣且曰自
門下去漳後無可與語者蓋以師涓審音季札
觀樂屬之門下况其吏才有餘倘得再出與畫
脂鏤冰者異矣柰何聾聵者衆而少涓札耶移
書邦鼎當道門下惓惓耳又聞使者頒賜寒廬
高誼何以報之冗次裁謝不宣

報王茶泉廷評書

西春亭中與明公飲芍藥花下驪甚也二十年
來同袍兄弟飄零如雨乃明公遐齡修河汾之
業于武山之上而紹青箱之學者振振在庭其
福厚矣莊誦華翰不能釋手綈袍戀戀真有故
人之情焉

又

日休堂上晚而讀易世間盈虛消息不足當兄
大噓獨馳念故交厚可知矣使者言長公力學
拾青紫如芥尚未抱孫如夫人尚有可夢鈴者
乎幸努力圖之所謂老當益壯耳

報少玄王孫書

貞吉孔陽在諸王中雅稱作者而君侯先之昂
足藝林伯華學憲懋功祠部道君侯文行不啻
口出辱賜家園十一詠及佳律一章江漢風流
託之不朽隋珠和璧楚人失其實矣侯異時九
頓以謝高誼惟君侯垂亮

報楊冲所戶部書

太玄文翰關西風節不佞仰高賢之日久矣右
丞宋使君每言明公同官齊魯聲名籍甚泰山
北斗之思益重耳江藩國計借重使軺寧獨洪
都山川之光亦守土者之幸也專吏奉迎幸明
公早命西吳之駕

報丘謙之太守書

文興至揚州不減昔人騎鶴之興瓊花觀中留
雄作否來教云訪王長公近日廟堂疏薦長公
者衆弇州園花鳥當作移文矣兄見長公為弟

言之

報祝望坪少府書

郢上借重高賢塵塵數月而江漢才遺痼瘵乃
身至今口碑焉不知何故坐福寧州被廢也不
佞方當事曾以片言解之而市虎成于三人投
杼疑于屢至無能為明公出綿力祇有寸心耿
耿耳世路羊腸浮生駒隙明公可一咲當之不
俟鄙人之喋喋也

報傅仁泉中丞書

明公簪筆柱下獨坐中臺赤囊白簡赫赫寰區
不佞弟傾心久矣比諗門下道履萬福靜養所
得日益弘深天下且多故

主上急于圖任才望如門下直儉歲之梁肉大
旱之甘霖也久欲申候起居而鞅掌不遑乃鄙
心則無日不左右也佇望五雲當有寵命下鳳
山錦水間矣幸門下加滄俟之

報蕭夔南少叅書

麻姑本字內洞天而執事精舍倚鳳凰山下夏

日正長涼風忽至執事真羲皇上人取枕中記
讀之當為一快前承使翰厚意久不報坐公冗
相羈尚苦邠鄆道中耳故人何以策馬

報范小泉大叅書

門下還自晉陽不奉音書者數年矣門下先憂
後樂之懷繼述有人而得快于長林豐草之間
其福厚矣不佞承乏漕道曾與長公比部共事
維揚長公少年老成英英有父風行將紹文正
而大之殊為通家欣慰也咫尺精廬不獲躬謁

二酉園尺牘 卷之十四 三
以話離索而江濤滾滾如雪殊有山陰命舟之
興敢遣一力代之家音過南中致意長公千萬

報曹荔溪中丞書

先太公品流高俊不佞家庭父子曾一及之是
時明公未入楚不佞未入蜀而私心業傾注矣
嗣會先太公風格整秀佳言如屑往還成肺附
交川北寓書尚作蠅頭小字曾報明公于西吳
之上乃凶問忽至先太公脩齡完福死且不朽
獨通家後進如不肖失其典刑人之云亡邦國

殄瘁匪但酒壚興嘆鄰笛傷心已也曾草奠文
方欲遣使而王材官忽至得明公手書孝履萬
福先太公反真宅矣且感且慰每念明公德業
赫赫士林可謂克肖先太公去沔陽一貪吏而
荆以西懲去臨江一酷吏而江以西懲民財以
興民命以全此真太平之業而高賢作用補天
柱地有不屑屑于尋常者山有木工則度之廟
堂方旁求俊傑以艱濟時如明公者未可一日
而山中也襄事之後努力加飡為蒼生一出耳

如何如何少海任先生與先太公稱雙壁曾約
不肖爲采真之遊青城芙蓉又爲神仙窟宅又
之杖履當尋此盟先太公之墓卽有宿草或當
一哭耳薄具香帛千里寸心幸明公致之几筵

報古建吾太守書

徽州吏來辱兄書貺感淪心骨言及于撫撫之
難治甲于江右而兄鐵犀之銘屹然在千金陂
上峴山沉碑不足擬也弟公期鞅掌卒卒無湏
吏之間而勉強操染以應故人之求無一好語
獨其心有足憐者幸兄一咲擲之

報習豫南學士書

往在長安過辱明公教愛感藏赤臆十餘年來
蹤跡參差而暮雲春樹之思時在武山螺川之
上也頃有天幸承乏西省得接明公光範而明
公握手吐衷古誼宛然獨恨沉迷簿領不盡請
益耳遠辱華翰惓惓相念又示詹君之劄昔元
朗何子江左名士也趙孟靜閣學王允寧司成
往在留院相與極驩海內傳爲盛事明公忠貞

似內江文章比華州而詹君詞翰翩翩元朗之
匹也載酒而游登高而賦雨花燕磯之間增其
佳麗矣便中幸明公以大作推教一二餘惟明
公加飡以膺大拜

報牛承庵憲副書

往明公弭節楚服江漢父老誦明公德政不休
而不佞奔走南閩無緣望旌麾以慰仰止之私
頃者使輅借重池陽而觀察尊銜繫于洪都南
浦同游道明公高雅表著士林而不佞羈東西
吳無緣覩清光以快寮索之願不佞于明公迹
若遇而把握實踈人雖遠而精神則近者也明
公亦亮鄙言之由衷乎黟縣令王子生里中人
又至戚也幸在明公屬下乞明公垂青之

又

秋浦雁鴻忽到章江之上明公念不佞厚矣明
公弘才偉望與九華齊雲並峙為宇內之雄不
知奉清光謝高誼當在何日也使至適按君
回省匆匆附謝明公當必憐而宥之

報鄔東泉巡撫書

近日郢上一二父老過訪不肖詢門下起居頗
悉不肖言門下抱道而處脩齡而善飯又芝蘭
滿庭中有取高科者一二父老仰天而祝頌大
齊而比萬石君家也不肖憶郢上剖符有盛德
者惟門下故位高者惟門下乃觀民情去思之
久則天道可知也專力馳候幸門下加飡以迎
福祉

報聶惕吾司理書

足下才高學博若倚天長劍載山巨鰲而遇事
應物如阪上走丸莫得而拘也文無害而刑可
措八閩稱良焉別來病冗相仍無緣寓書一謝
高誼每詢尊公起居萬福足下報國之日長矣
萬惟加愛以膺內召

又

一月之前曾具竿牘奏記室而華翰先焉且知
榮滿矣行百里者半九十蓋言末路之難也明
公以是爲慮乎不佞考期亦近卹卹乎不敢自

寧佩尊教比韋弦矣閩海之間兩暘時若皆明
公祥刑之所致也每與戴憲長公言之殊切欽
仰耳五雲丹詔旦夕且下幸明公加飡俸焉

報王麟泉中丞書

春間有使入長安曾奉一書候門下乃門下榮
轉獨坐掌憲留都使者未敢以書進而不知門
下于不佞有綈袍戀戀之情也咫亭丈在壯而
門下在南鷹揚虎視震肅百寮可謂近世獨步
而主上倚之如左右手此國是所關非特八
閩之光區區不佞與交之幸也便中奉候起居
聊見江湖遠吏馳情雲霄故侶耳

報曹方夔進士書

往校渝州得吾友雄文竒之卽公家子建八斗
之才吾友似得其半見春秋兩魁殊爲欣慰頃
者借重東鄉聽鳴琴于單父聞弦歌于武城不
佞之至願使來得翰教知尊公仙逝矣聞之飲
泣尚憶尊公長衫巨履褻然儒生竟老學究而
吾友少年高奮丕揚庭訓九原有知當含笑矣

兩院處已稍致微力或有所處別具少見鄙情
愧不能厚公期鞅掌恨不能為文一哭耳所願
吾友幸此身之尚存卽尊公之不死異日者勉
効勲名一光鄙劣或亦尊公平日之念也幸吾
友俯聽之謹專一力少代抵掌匡山寒雲知我
心曲言何能悉

報詹東圖孔目書

大書佳甚鄙意見長歌中昨移書習學士道足
下才美蓋何元朗蔡九達之匹也武夷茶二斤
奉上一醉愧無清泉香餅可潤君謨筆耳

報畢復吾少叅書

廬山為天子都鄣不佞三四度而未遊卽山靈
竊笑焉故人如門下可同杖履十年離索之苦
當于五老峰頭一盡吐之靖節酒壚屬之門下
幸門下洗酌待焉

報茅心淵比部書

暑中辱明公尊教又得三山志讀之中冷水若
可消渴金焦蒼翠宛落衣帶矣願其志蕪陋且

久未脩往不佞在瓜洲時竊有志焉而未能明
公鄉人也文章素號大手筆而金陵宦况間適
可饒爲之幸一洗山靈之塵勿謂鄙言爲迂也

報張懷琴太守書

往舍親歐給事道明公流品高潔私心嚮往後
明公官蘭省出入周衛之中曾一望顏色恨未
往還而剖符建寧則共事一方矣辱明公愛雅
惓切深相結者餘二年而不佞有江省之役前
過建寧見明公戀戀難別而明公德政上下僭

之如出一口乃知昔人度虎訐鶴還珠馴魚貫
金石而照今古皆至誠足傳耳明公考績已久
榮轉旦夕倘得周旋一堂尤鄙心所欣慰也不
佞尺素承明公壽梓壁兒後序中及之感當世
世矣

報劉念南少叅書

使旌將王事而得書繡里門不佞未獲躬謁三
山同袍之愛被及寒廬者如江如漢敬掃滕王
江閣一候使旌也

報聶崇野憲副書

淮海相逢極辱兄同袍兄弟之愛嗣後弟奔走無寧日及再至淮而兄勲業屹然中原比至洪都而兄歸寧梓里天下且多事弘才雅望如兄宜早出以濟時艱所謂一飯千金之日也可高枕于山中耶貴鄉民瘼門下知之更切幸爲故人道焉

報聶念初少參書

閩中候使輅而未至及至明公梓里而未晤也語有之既見君子我心寫兮不知何時可遂耳崇野兄高臥而明公並棲雙壁朗朗增雲林三十六峰之秀第今水旱頻仍猶已溺之猶已飢之正明公之心也願輶軒早出以援之江省之水比去年差小而積逋久困宜何如以蘇息之明公有長策不佞傾心以聽

報陳靜庵憲副書

楊燕山兄歸自長安弟卽詢兄起用消息而渠云太宰公屢言之蓋兄清貞慷慨孚于輿論且

夕寵命爲中原善類之快不獨同袍私慶也

報劉覺吾吏部書

門下尹涇典銓赫赫有聲足爲同袍兄弟之光而不根持論者柰何蔽美也屈原有言戶服艾以盈要謂幽蘭不可佩蘇糞壤以充帟謂申椒其不芳蓋縱古已然矣出處進退有道者酌焉非風塵俗子所敢請也前公子奉太公書遠顧通家之情渥矣附謝不宣

報朱明虹方伯書

陳于韶任少海張助甫序大作俱齒及不佞附驥尾而名益彰乎不佞之幸也貴陽佳稿鼎中一嚮而翩翩詞翰足文其山川之陋矣弟檢簿書中無可報瓊者幸高明垂亮

報鄭學曾秀才書

尊公純德粹行比于古人共事一堂雅稱莫逆柰何勞王事而死耶殊可痛耳前晤執事少年美才蘇環有子矣專吏修束芻之敬賻儀共約八百金幸查收之惟執事節哀力學以彰式穀

之教

報劉芝陽大叅書

不佞往游果州卽明公旌節之邦也近游江州
又明公桑梓之鄉焉明公尊教倦倦于不佞非
以是乎而不佞當明公金馬石渠之日神交已
久不待浮蹤之近而始傾心者也同聲相應同
氣相求理固爾耶明詩川扇敬拜尊賜白雪清
風爲之忘暑矣

報張名川憲長書

承門下惠武夷茶葉富海粉食之如在三山又
恨荔子盈庭不能生致于不佞莊誦大教曠若
發矇不啻細骨香肌矣執鞭弭屬橐鞬與明公
周旋尚有日乎使者反命謹此展謝

報吳肖渠憲副書

羅浮一雁遠度蠡湖來繼舊好其明公之高誼
乎登滕王閣兩作子安有知當心服矣夕佳樓
少雄作豈未登耶小記奉覽幸明公臥游之郭
永安令竟古人耶承門下賻恤不佞心感之在

九京者可知也

報張謙齋少府書

明公榮滿矣中冷之泉清而冽焦山之景佳而麗明公之才美清操似之乎夜來暑甚夢登綿屏山與陳于韶先生大醉而別晨起則明公之書翰至矣乃知明公之投合不佞不減于韶閬州金石交有兩矣有人入蜀爲不佞寄聲于韶可也

報陳愚所憲副書

往叨侍次公榜末極辱同袍之愛嗣後雙壁屹然柱下機雲軼轍海內孰不傾心伯仲哉通家兄弟不言可知也頃者使旌借重徐州中原要地非明公弘才雄畧不足以鎮之况齊魯旱乾淮揚水滂與昔時大異而不佞守淮管漕蓋五六年往還于徐今得明公殊爲并州父老一快慰也次公久于家清望甚著聞當路者推轂之想寵命旦夕下矣茲因兩生過訪之便附候記室不備

報王唯吾侍御書

往讀明公諫書忠而不憤直而無隱足以彰

主上容納之美三代而後屢屢見者神交于明
公久矣十年前曾讀胡公杞泉疏而壯之惟明
公足以繼焉今寥寥矣大稿有梓希一見示漢
郢遐方暫借明公使輶

主上卽日內召昔長沙之有太傅黃州之有長
公至今爲山川之光卽明公甫臨而江漢生色
矣高賢踪跡豈易逢哉仙舟泊南浦極欲走謁

聞道體畏暑不見客故未敢面乃私心則瞻依
左右也不佞有草堂在沔水之陽明公倘有過
沔之日乎幸留大作于壁間俾楚人寶文翰者
不獨有洛陽眉山之重則厚幸矣

報滕少松中丞書

去歲不佞叨官貴省尺素往還極辱門下道義
之愛感藏赤臆永矢弗諼及過通德里門又知
門下華胄世業不減王謝而里人誦門下純懿
粹美如出一口不言而躬行卽古萬石君家不

嘗過之宜中外勳樹見之者景駭聞之者嚮震也頃者

主上以吳越重鎮寄之門下昔張司馬弭其變溫司徒安其常至潛消默運使悍卒頑民熙熙乎游于春臺之上非門下而誰耶古稱三后協心同底于道道洽政治澤潤生民四夷左衽罔不咸賴敢為門下頌之况菁莪棫樸之化在十年前甄陶士心者家傳巷曉所感殊絕但持衡典選廟堂虛席以俟卽吳越恐難久借此寰中

善類之慶非不佞一人之私也

報胡松麓大參書

瑞陽德澤春水風猷兄所貽于洪都者遠矣乃今全省糧餉借重高賢匡山雲樹蠡湖魚龍欣欣然迺使輶也况士民乎同袍兄弟解携已久音問復踈把臂周旋話二十年來離索之踪非有生之大快乎謹與桐岡兄掃徑待焉

報石楚陽戶部書

承手教業撥一舟候使輶矣連日暑甚卽昔人

飲河朔琢冰山恐無以避之况明公于役王事
耶江風正順水月近人或可免鬱蒸耳年來楚
國不競仕宦寥落公等起而振之足張楚矣殊
為桑梓一快也專人修行厨之敬揮汗草草

報范子厚檢討書

得月夜見懷佳詩清新俊逸把玩忘暑青出于
藍語正不虛矣何夜無月何處不登樓而又何
時與執事晤耶容為俚言酬之

報王希泉吉士書

使還得翰教驩次于面子厚月夜懷人詩佳甚
公可少此耶張大司馬省甫贈不佞詩有云再
見蜀中逢李杜可知門下有王楊兩公翩翩詞
林異代淵雲之匹乎寧獨重蜀且為不佞重矣
天尺樓詩公許集諸名公為一冊見惠子孫永
寶之亦陳氏之天球河圖也

報孫受齋祭戎書

家叔走南浦相看時時說親家高誼今愛賢淑
宜其家人柰何天絕也寒荆哭之痛乃小女亦

然天意殊不可曉耳公子偉丈夫聞襲華胄職
矣揭旗擁旄又旦夕事苟可推轂當竭綿力焉
梁少府劉司理俱以公子託之矣

報劉中吾司理書

癸未之春得奉足下清光殊慰鄙懷嗣過川北
曾一詢宅上而足下有司理襄陽之命矣一二
年來不佞南入閩西入江去故鄉益遠未獲通
候于足下頗有離索之苦而足下今問風猷在
瀟湘者浸淫行溢所謂稀鳴桴於砥路鞠茂草
於圓扉者也

主上刑措之化始自南國異時望峴首而興思
覩漢廣而詠歌足下勲樹埒古人矣往見足下
雄作魁于三巴今見足下治行冠于三楚真足
爲舊游者之一快也梁少府行草草附候便中
幸惠德音慰我長饑

報歐茂野憲副書

門下文筆日進讀家譜可知也俗子何得好語
而冠之火坑中念經亦了願耳每憶公家宴客

如羅漢請觀世音異時請十八尊者各具一觴
觴不肖作潤筆乎幸語之博諸公一鼓掌耳如
何如何

報龔日池少叅書

尊夫人內行愧疲駑者無以宣之乃明公爲之
天又爲之狀其人與文俱足傳也柰何有于鄙
言乎倘明公改正傳之家乘作世交話柄不佞
之幸也又羈尊命悚愧不勝

報詹咫亭中丞書

閩中奉翰教接清光雖未獲朝夕左右而門下
同袍兄弟之情完好如金石今門下晉御史大
夫矣寰中善類動色稱慶知愛如弟不言可知
夫蘭臺石室獨坐之權至重也而自古慎重必
正色立朝者足以當之門下先朝直臣赫赫有
聲巖廊間而得膺寵命真如張湯倪寬之在漢
顏真卿李景讓之在唐江淹之在梁張昇之在
宋皆前代不朽人也門下似之卽日持衡當軸
社稷生靈之幸不獨同榜之光也江省去年水

荒今秋亦未全熟歲入天府之供季散諸王之
祿日苦不支其難甚于它省而况不佞疲駑乎
語曰無米之炊巧婦尤難拙者畏而思逃矣門
下以并州視洪都以故人視不佞也幸有以鞭
策之

報凌繹泉水部書

門下閉戶著書垂白不倦此昔人經世之大業
不朽之盛事今先大夫見之得無快耶近奉手
教復梓類書名曰學海清瀾公之天下王充論

衡不必私仲長統昌言不足多也又命不佞草
敘豈亦憐通家交厚俾託名千載耶不敢不勉
圖之

報張石渠先生書

程生來承老師手翰讀之感泣昔人有言生平
少年日分手易前期及爾同衰暮非復離別時
此語可念也不肖別老師已久時形夢寐又多
少年時事老師惓惓馳念彼此同之矣專人代
候兼以為壽

報費國聘僉憲書

武夷望二華何啻萬里而足下入關以來不佞
僅致鳴鳳周生一書耳周生浪游何可計浮沉
也春間聞足下有左官之報令人曠惜卽欲裁
候起居會移官江省冗冗未遂所私文傑程生
來得足下手教驩次于面且知暫寧家園與尊
公爲庭闈驩豈以一日之養雖三公不易耶第
足下冲襟粹抱爲時珥璋幸早出以濟時艱况
宇內山川待其輝潤無論召還有期卽古來文

章進于謫居者不少漢之長沙江都唐之龍標
夜郎宋之滁州惠州諸家歷歷可指而近日子
與明卿說者謂其詩窮而後工又如銅梁張大
司馬里中傳大司徒并其勲業而上之大都少
年高才者也年少則志可帥氣而歲月有餘才
高則能可兼衆而操染不乏又何事不成乎幸
足下俯聽之勿耽樂于家園也具區馮太史亦
同遭此才人遠駕漢宮之妬亦清朝缺事也不
佞曾以前語寓書具區知非貌言也不佞掌在

米鹽日掃竈上塵而間爲文詞老不曉事嫗母
刺繡重增醜耳足下何以鞭策之

報鄒穎泉方伯書

暑中承長者手書薄帷鑒明月清風吹我襟又
何快也沙米事衆論紛紛得尊教始知貴邑加
兌軍米一千二百石而減在它邑矣同室有鬪
被髮纓冠而救之在父兄之賢者尤急急也俟
有定議專復記曹

又

夜來四山太史使旌泊滕王江閣愧俗吏病冗
不盡請益耳晨起得門下華翰及所題夏大常
竹清風隱隱起四坐且劉生以東廓先生與心
川子問道像命不佞贊焉宛如身洙泗之上而
挹江漢秋陽之光公家三世被及鄙人遠矣草
草附謝

報劉茶溪總戎書

幕府清暇持翰貺詢故人于章江之上卽暑中
清風矣大將軍勲樹休鬯覆露與國班荆道舊

更在何時三五明月滿四五蟾兔缺秋來懷大將軍更甚三山或有夜夢到洪都也

報朱貞石給事書

往年鑑湖書札時到武夷山中始知明公于不佞以淮浦故人遇之高義薄雲天在交游中指不多屈矣頃者明公借重南垣昔人謂天下之事宰相得行之諫官得言之言行而道亦行焉前讀明公一二奏草種種有關於國是古稱補闕拾遺無以過之不佞平生拙于宦途職掌米

鹽委瑣齶因憶作府時繼傅後川相去塵二三年渠又典大司馬矣督漕時繼楊後山制歸塵駘却步焉大鵬之翼垂天九萬里鷦鷯一枝焉雖時命使然亦才品殊絕聊與相知陳其苦懷耳故人在天上肯曲加引手乎

報江亨泉侍御書

南充難治甲于中原明公與不佞耳目所覩記者然明公烹鮮之手馴雉之化淪于三巴者已

與衆異不佞心竊竒之後見行取之報喜也欲
狂豈以一臺諫足榮明公哉正謂明公升巖廊
之上後來者有所觀法而興起彼樵周亦古之
聞人也豈真爲崇而令宦于其土者有不利耶
惟德動天至誠感神天與神不能違而况于民
乎明公之治南充是也而不佞喋喋并州之懷
故人之念其情之相關者如此今明公豸冠鐵
柱繡衣白筆屹然南床之上避桓典之馬埋張
綱之輪又明公餘事登覽舒嘯之暇尚念不佞

沉淪江海乎風便願有以教之

報彭念川侍御書

不佞與朱秉器同心交秉器向不佞道明公不
休乃明公金輝玉潤沾漑良多閩海深相結脉
脉在形骸之外矣卽無秉器言當把臂入林獨
益我以良朋者秉器之愛也昨章江一晤數言
而別道路阻且長會面安可期每念明公腸一
日而九迴也青瑣多暇廟筭益勝今西北多旱
東南多水貴省塵塵有秋今疲駑者強支歲月

然元氣索然此扁鵲倉公望而走者也愛我如
明公更何以終教之

報黃襟川侍御書

使旌畫繡里門不佞幸獲晤言之適乃明公令
問風猷令人欽仰汪洋千頃足消鄙吝何期千
載再見吾叔度耶大江金陵盈盈一水而雨花
臺燕子磯秋來風物更勝明公執簡論列之餘
登臨舒嘯亦有西山南浦之懷乎不佞于明公
意氣相投傾蓋如故幾欲裁候起居而簿書期

會了無暇刻時時與祠部楊懋功道之知非誑
語也貴鄉年歲稍稍有秋然積困夙逋莫可為
息明公切被髮纓冠之救願有以鞭策之

報陳海樓侍御書

往不佞承乏閩中時明公綰綬名邑竊見明公
方廉溫厚蟬蛻于塵壒之外矚然而不污巖然
而不可下也私心高之別後二三年間見長樂
口碑屹然海上與扶桑競爽益信高賢作用迥
絕曹偶耳幾欲具尺一之書奉候起居申暮雲

春樹之思而移官南浦了無暇日且江省繁難
十倍于閩而疲弱者勉強支持真楮小而懷大
綆短而汲長也明公肅繩司過察天下之吏治
倘有聞而督教之俾知省改可也良朋箴規竊
于明公有厚望焉

報孫鶴峰侍御書

往先公與龍峰丈後先職方雅稱莫逆而不佞
與鹿峰丈少有文字之契雖于明公厯厯接台
光奉高論而王勃伯仲之才岑參兄弟之奇說

株樹昂足者被及三楚而况閭巷乎而况不佞
通家之好久而深者乎前過新野見明公百里
之化三年之政口碑燁然漢時卓魯俱在河洛
今得明公而三矣數年以來南風不競楚人察
落而南臺之上借重明公絳騶白簡表著宇內
其爲桑梓生色多矣不佞承乏江藩幾欲裁候
起居而公期鞅掌卒卒無須臾之間謹專一力
代布區區金陵在望無任神馳

報解見槐叅將書

與將軍握別後音問不絕真猶夏口之達淝城也乃勞專使厚貺轅門清泰四顧無刀斗中必飲羽將軍之力全矣閩海能久借乎使者還楚後始領報音惟將軍加食以膺推轂寵命

報龍君贊進士書

足下靜修栖雲方中而游于六合之外行將奏賦闕廷五色呈瑞霖雨蒼生矣俚言雜司馬諸公中覺我形穢耳惟足下教之尊公尺素往來四明山中宦况甚適足下勿以爲念

報何心泉侍郎書

往巴酉之歲家丈人胡白湖主貴省試公家兄弟翩翩而起後明公典選天曹裴楷之清通王戎之簡要兼而有之天下無滯才而亦無倖進守淮入覲時幾欲造謁而例禁方嚴徒有仰止之私而已明公華翰尚記識不佞于稠衆中耶語曰士伸于知己而詘于不知己明公蓋不佞之知己真不在面不面也傾者承乏貴省見山川洪麗宜有一代偉人如明公者華國禎邦隆

聖朝丕丕之基幾欲寓書布此積懷而文奏盈
前徒懷忉怛之念而已明公先施若納不佞于
春風時雨中耶今天下且多故矣其要在賢守
令而上之獎薦者與民情大異槩之天下不獨
江右爾爾明公論廣昌數語卽兩漢循吏何以
加焉無論廣昌必賢而明公憐才好士不啻自
其口出卽日掌邦治統百官則孤寒者進而士
多庶隅恬退者顯而士有節介如是而太平之
業不如往代者未之前聞也不識明公以爲何

如使者報謝不恭并布縷縷惟長者進而教之
幸甚

報袁雲江比部書

往不佞官廷中時與諸公謂西衙門恤刑蓋仙
差云而不佞不獲一遇 聖主金鷄之詔遠下
豫章明公特膺寵命暮月以來周旋十三郡中
無間寒暑所以求生道者不遺餘力得古人緩
議敬忌之遺今明公還朝矣夫秋荼密網比于
夏日明公解而寬之甘雨和風習習在匡山蠶

湖間卽不佞未面台光而沾被多矣至高門駟馬願昌其後敢為黔首代祝焉不腆將忱惟明公鑒存之

報王永叔進士書

不佞往在淮揚侍太公之教知已恩深等于生我乃兒曹幸附兩令兄榜末宇內通家在交游中無二也頃者明公畫繡梓里獲晤言之適古來以青箱朱輪後談公家未有如今日之盛也不佞滿擬尊酒話心稍慰飢渴而暑氣方殷兼聞道體酬應無暇敢以薄敬申之扇頭一詩情見乎詞皖城咫尺尚得馳候左右也

報袁太冲先生書

寧化蔣主簿來得手教旋以俸金少許寄上不
知浮沉若何也宋季鷹參知行草草爲俚言奉
壽老師丹砂幾成七還九轉青精之飯碧海之
菜得而食之可能分惠弟子耶仕宦不止車生
耳不佞行將從老師于五湖間矣不腆將忱萬
希鑒存之便中惠教幸勿曰素券之位俗子何

二酉園天牘 卷之十四 四九
敢與知而僅以寒溫相聞也

報馮文所學憲書

閩中附一檄于寧化蔣簿道神交之私而不佞
出閩關矣前書曾到明公記室否明公博聞高
韻表著藝林真翔禽之羽毛衣被之綃縠不佞
恨不快覩之敬以拙草一部奉上斤正幸明公
慰其區區

報馮咸甫進士書

讀足下尺素及彭城見懷詩何惓惓牛馬走也

元瑞汝翼亦然獨廷韓寂寂聞病果真耶近爲
友人草一序中及足下并二三子覽之又知不
佞惓惓足下也往足下遊山陰道中壯哉記述
王子猷雪夜淺乎興矣

報張漸江方伯書

蜀中至海上閩中望吳下何啻萬里而衡陽有
回鴈峰此音問所以遼絕也老伯母違養五十
而慕吾兄孝思之苦何以爲情襄事計畢終制
有期天下且多故才品如兄真水滂之隄防旱

二世園尺牘 卷之十四 五
乾之豐注也輜軒一出可濟時艱况同袍兄弟
落落如辰星言之有增慷慨者公子大作想日
長進雲間二陸河西兩馮弟早竒之幸見教以
觀新得也如何如何薄具轉之几筵申束芻之
敬

報龍君善書

使來得扇頭詩讀之一快詞清思遠比去年大
進字畫適逸有子敬書羊裙風致真公家世美
也而以詩詢不佞不佞四歲時索先職方公詩

選集中有書武兒扇者足下可一覽之而學幾
四十年漫無所成稍稍管窺敢為足下道之昔
嚴滄浪云詩有別才非關書也詩有別趣非關
理也天下豈有寡學之才無理之趣哉非關書
者才之放也而非外書也非關理者趣之妙也
而非外理也循常蹊徑難以揣摩羚羊掛角無
跡可求正此謂也少陵乃云讀書破萬卷下筆
如有神理載于書得其理者才達而趣佳大而
化之至不可知之神也殘膏賸馥足飽千古此

子美之所以聖于詩與諸體之中惟律爲難故
比之音律法律有首尾俱對者首尾不對者情
景交用者惟少陵爲最而其餘唐人若高岑王
孟起句多突兀如狂風捲浪勢欲滔天頷聯多
接如驪龍之珠抱而不脫頸聯多應如疾雷破
山觀者驚愕結句多穩如剡溪之舟自去自回
中間一情一景又如金石之難移玄素之難混
也不佞謂足下三詩結語俱妙如亦有扁舟與
那辭十日留爲起句爲中聯亦可也幸少更之

如何如何王敬美每言今五尺童子纔拈聲律
便能薄棄晚唐自附初盛謂稱大曆而下色便
赧然使誦其詩果爲初邪謂初晚邪謂晚大都取法
固當上宗論詩亦莫輕道詩必自運而後可以
辨體詩必成家而後可以言格晚唐詩人如溫
庭筠之才許渾之致何得易及直風會使然耳
作者須真才實學本性求精勿先論體格也不
佞謂今時之病不但止此往往生吞于鱗拆洗
元美以山林而事用廟堂以韋布而引同公卿

真如鶻為冠而所珮則玉荷為裳而所履則珠
執笏于山披裘于暑襲而取之真可捧腹尚得
為詩乎足下四詩本于性情如玉潤漸無類珠
沉祇自悲驚魂動魄前無古人獨河陽不耐愁
之句蓋用潘安仁悼亡事而稍晦也皮日休有
言百煉成字千煉成句太白發句謂之開門見
山足下少留意焉不佞鄙見如斯而足下高明
洞朗謝朝華於已披啓夕秀於未振觀古今於
須臾撫四海於一瞬少年之日何事不成昔曹

植有言曰劉季緒才不能逮於作者而詆訶文
章掎摭利病陸機有言曰雖濬發於巧心或受
嗤於拙目古今人情豈甚相遠乎南充任少海
每言詩為神物高可薄鈞天下可徹寒泉而唐
開元長慶隱顯數百家稱雄藝苑纔一兩人耳
且然奔播瞿峽長流夜郎了無著足處近日如
子與明卿助甫肖甫諸家俱以少年去國而長
于文學詩必窮而後工此古今不易之通論也
足下將之謫所矣宇內山川待其輝潤不佞平

生少遷謫今垂老不堪此矣韓子有言曰和平之聲淡泊愁思之聲要妙懽愉之聲難工窮苦之聲易好宜不佞之詩遠謝諸家故于足下之行壯之而偶論及此讀書務實尤至望焉丁憲使于約所朱公惓惓于身後不佞心高其誼入鄉賢事當勉圖之然朱女早殤其厚如此况不佞與足下耶足下異時又不佞之右武也足下以爲何如偶爾病暑臥胡床上口授使者言多無倫幸足下咲覽之

報陳春宇學士書

龍君善使者來詢兄近况知兄閉門却掃教習梨園明裝姣服浩歌曼聲婆娑其中其樂孔嘉昔康對山王羨陂楊升庵李中麓徃徃口占樂府命變童歌焉古來大臣退休隱令名而彰主恩意蓋如此金谷園風流想見其盛南山種豆之歌酒後耳熱當不出口益知陶之酒阮之琴稽之鍛謝之山水皆有所託而逃焉者也不佞老而倦游即日圖歸訪兄于桃花洞天當推

所樂而共之矣風便幸惠教言以慰長飢

報司馬景泉太守書

樵陽山水甲于七閩而民近古故城西有山曰登高亦以大夫能賦名之也况足下治之以古道乎先文正公集如命一序昔唐魏謩存祖徵遺笏識者尚嘉之而足下一新祖集意弘遠矣使者留五日始行知足下憐簿書困我耳

報李充予吉士書

明公少年高才在金馬石渠之上寰中善類莫不傾心而江湖遠吏仕于其土景仰尤切數月之前幸接尊公顏色數年之前又荷給事公教愛老泉風猷大蘇可識嗣宗標格小阮可知即未侍明公左右而通家交誼業心許之矣尊公博學好修雖未一第而天道報施不于其身則于其子明公廣廈細氈從容啓沃鼎爵崇封知在旦夕稽古之榮身親被之矣給事公以故人遇不佞而下詢文章之業明公掌在禁苑抽金櫃石室之藏無論追古廬陵臨川南豐諸大家

二酉園天牘 卷之十四
而昭代文如羅景鳴詩如嚴惟中可起而紹之
家庭之間自相師友况廟筭諫草莫非至文敝
帚之詞重增其愧耳明公見兩公幸以鄙言質
之公移附使者壯矣

報莊彥升秀才書

中益進士曾讀行春樓詩草左史公佳郎曾讀
時義皆可大公家吏部公之業者柰何化爲異
物也足下兄弟連床之話苦矣不佞聞之鄙心
刺刺作痛太史公父子又何爲情耶不佞有數
字寄左史公勿爲造化小兒所苦也學使公處
道足下博學善屬文矣豐城之劍合浦之珠即
在水土中光彩貫日星鄙言贅耳

報李北山少卿書

徐山人孟章來得足下手教獨所寄扇頭詩化
爲烏有矣不佞奔走閩海大江間無虛日即有
鴈魚何得到日觀峯頭每逢人詢起居則云足
下山居頗適獨尊目少病耳佳稿勉爲一序以
完十年夙諾希世大聲恐非稔折楊皇華者所

能辨也幸足下教之

報袁德門太守書

不佞于魯望大自臭味同袍中無兩也况表揚遺文重之以尊命乎昔任昉有言嘗以筆札見知思以薄技效德不佞之心也獨恨文辭鄙俚明公裁教之耳魯望外集異時檢上還一刻之報龍渠西博士書

不佞于公家無論與伯貞同榜莫逆結兒女之驩乃尊公與先君賢伯仲與先兄奕世交好何

啻孔李耶往年君善過寒門知足下秉鐸青陽矣幾欲脩候而世路多岐不能如願足下授程生書近日始到歲月長遠矣秋浦春雲殊有美人之思偶牛兵尊遣使者至洪都知足下講席尚在大江間弘六館之文縮百里之符又旦夕事通家兄弟連床話舊當在何日耶臨紙依依報趙潛峰司理書

執事旌節往來采石金陵間江上魚龍驚數千年再見太白絕調矣不佞昔在三山于宅上厓

致戔戔之忱而抗塵走俗恨未移書秋浦耳然
武夷雲氣鯉湖濤聲雄天下安知非明公顏色
耶差足快耳

報劉節齋中丞書

門下還朝此明良之遇而蒼赤之福也彈冠而
慶者尺寰宇矣况不佞素荷門下鞭策兩繼高
賢之後者乎思補有軒仁壽有堂每一履之若
披雲霧而覩青天韋弦之佩近在左右頃辱門
下潯陽書貺馳情故人良亦厚矣草草附謝

報李右齋大尹書

給舍公書來得門下所撰五經疑義讀之不能
去手夫五經之旨與天地並周公朝誦百篇孔
子韋編三絕况其下乎班孟堅謂諸家各推所
長窮知究慮以明其指亦六經之支與流裔耳
邇來空談者視爲糟粕浮詞者目爲陳腐此滅
與穀之亡羊也門下微言分析大義招曠上下
數千載間斯已勤矣何時問楊子之玄亭扣馬
融之絳帳一快生平耶

報李榕崖給事書

西省兩得明公翰教讀之如侍左右同心之言其臭如蘭乃知出門有功相觀而善蓋自巫峽時然矣念雅素而不遺封菲明公有厚道焉前見長公意氣翩翩近得令姪史氏書符彩燁然古來王謝在君家矣別具申寸私并以先集請正彭蠡秋來雁聲嘹唳知雲霄有繫帛也

又

夕郎批勅不暇暇詢江湖故人厚可知也獻吉

大江以後詩比于子美夔州以後不佞何敢望焉太公五經義中多獨見語業爲書謝之昔司馬班劉俱以子終大業太公真漢儒足下又何讓龍門蘭臺中尉耶幸勉圖之

報楊霽寰憲副書

閩中辱明公手教讀之如面清光嗣後使軺借重穎上矣夫淮泗天下之樞高皇帝湯沐邑而濠梁蒙亳之間多高賢遺跡明公壯游足快焉况近日齊魯旱乾吳楚水溢中原多故彼要

地也非高明孰振之哉會見勲名橫絕四海此
順風而呼聲非加疾其地其時使然也不佞入
江省朞月忽忽三年滿矣職掌米鹽襍選膠葛
了無暇刻明公過淮倘詢往年治行壯年易辨
今倦游矣與明公班荆道舊更在何日耶

報胡崧麓大叅書

兄特起山中彈冠而慶者不但二三兄弟柰何
以道體違和欲高尚其事耶在兄雖號肥遯而
簡書可畏兩臺意多勸駕詳公移中桐江烟月

之勝恐當遂之它年耳

報盛淳庵僉憲書

西春亭握手鳳凰山話別忽忽十餘年矣兄高
臥山中而弟周旋于巴蜀閩海之間去華亭幾
萬里音書稀阻亦其勢然也每詢兄起居咸云
勤于課子敏于治生古來范蠡之策贍國贍家
石奮之教是父是子殊為私心一快此觀兄之
外者而兄曾次豪爽將以六合升沉千古興替
在手談坐隱業付之一咲矣兄以鄙言當乎否

二酉園尺牘卷之十四
也季雁山兄行便草草代面若第抗塵走俗之
狀不敢向有道者喋喋耳

二酉園尺牘卷之十四

終



